



**REPUBLIKAY'URWANDA**  
**INTEKO NYARWANDA Y'URURIMI N'UMUCO**  
**(RALC)**

**B.P. 5796 KIGALI - RWANDA**

**E-mail: [info@ralc.gov.rw](mailto:info@ralc.gov.rw)**

**Website: [www.ralc.gov.rw](http://www.ralc.gov.rw)**



**AMATEGEKO Y'IGENANTEGO**  
**RY'IKINYARWANDA**

**Kigali, 2017**

**Umwanditsi:**

Inteko Nyarwanda y'Ururimi n'Umuco  
Rwanda Academy of Language and Culture  
Académie Rwandaise de Langue et de Culture  
Agasanduku k'Iposita : 5796 Kigali, Rwanda  
Imeri : info@ralc.gov.rw  
Urubuga : www.ralc.gov.rw

**© 2015 Inteko Nyarwanda y'Ururimi n'Umuco (RALC)**

Agasanduku k'Iposita : 5796 Kigali, Rwanda.

*Uburenganzira bwose burashinganye. Nta gice na kimwe k'iki gitabo gishobora kwiganwa, gufotorwa, kubikwa ku kintu icyo ari cyo cyose cyangwa gutangwa nta ruhushya rwanditse rw'Inteko Nyarwanda y'Ururimi n'Umuco.*

Irangwa ry'igitabo :

**Inteko Nyarwanda y'Ururimi n'Umuco 2017.  
Amategeko y'igenantego ry'Ikinyarwanda  
Kigali: RALC**

ISBN 978-99977-700-0-9

Icapwa rya mbere 2017

## IBIRIMO

Iriburiro .....	2
Ibisobanuro by'ibimenyetso n'impine byakoreshejwe .....	4
1. Amategeko y'igenantego yerekeye inyajwi .....	5
1.1. Iburizwamo/itakara ry'inyajwi.....	5
1.2. Kwiyunga kw'inyajwi. ....	5
1.3. Ishushisha ry'inyajwi. ....	5
2. Amategeko y'igenantego yerekeye inyerera. ....	6
2.1. Ivuka ry'inyerera.....	6
2.2. Iburizwamo n'iyungana ry'inyerera.....	7
2.3. Igurana ry'imyanya y'inyerera.....	8
2.4. Iyungana ry'ingombajwi n n'inyerera y itangira ibicumbi by'amazina yo mu nteko ya 9 ari mu bwinshi mu nteko ya 10. ....	8
3. Amategeko y'igenantego yerekeye ingombajwi. ....	8
3.1. Iburizwamo ry'inyamazuru. ....	8
3.2. Ishushisha ry'inkubyi.....	9
3.3. Ishushisha ry'inyamazuru.....	9
3.4. Ishushisha ry'ingombajwi b inyuma y'ingombajwi n.....	10
3.5. Ihinduka ry'ingombajwi r ikurikiye n.....	11
3.6. Izimira ry'inturike hagati y'inyamazuru n'inkubyi.....	11
3.7. Itanisha ry'ingombajwi.....	11
3.8. Ukwiye kw'ingombajwi n'inyerera y bibyara ingombajwi ishyizwe mu rusenge rw'akanwa rw'imbere. ....	12
3.9. Kwiyunga kw'ingombajwi n'inyerera y. ....	12
Ibitabo byifashishijwe.....	15

# AMATEGEKO Y'IGENANTEGO RY'IKINYARWANDA

## Iriburiro

Igenantego ni ubumenyi bw'iyigandimi bwiga imihindukire y'amajwi mu ihura ry'uturamajambo. Uko guhura k'uturamajambo gutuma havuka amajwi mashya atandukanye n'ateganywa mu ihura ry'uturamajambo, yubahiriza imivugirwe y'ururimi.

Igenantego rero rigaragaza amategeko asobanura ihinduka, ivuka ry'amajwi atari ateganyijwe, itakara ry'amajwi atari ngombwa mu ihura ry'uturamajambo. Ayo mategeko ni yo yitwa "amategeko y'igenantego", akaba kimwe mu bice biba bigize ikibonezamvugo cy'ururimi.

Nk'uko amajwi y'Ikinyarwanda ari ukubiri; amajwi nteme n'amajwi saku, ni nako habaho amategeko y'igenantego nteme agenga ihura ry'inyajwi, ingombajwi n'inyerera; n'ay'igenantego saku agenga imihindukire, imyimbukire, imitakarire cyangwa imituranire y'amasaku.

Iyi nyandiko igamiye kugaragaza amategeko y'igenantego nteme agenga iyungana, ihinduka, ishushisha, itakara, inyereza, ihinduranya ry'imyanya, izimira by'inyajwi, ingombajwi n'inyerera. Amategeko y'igenantego nteme, ni yo akenerwa cyane n'abiga Ikinyarwanda mu kicio cy'amashuri abanza n'ayisumbuye bifashisha inyandiko isanzwe, idakenera kugaragaza amasaku. Iyi nyandiko ikubiyemo amategeko y'igenantego ry'Ikinyarwanda asanzwe akoreshwa n'andi atari yaragaragajwe mu bitabo by'iyigandimi ry'Ikinyarwanda.

Iyo uturamajambo duhuye rimwe na rimwe amwe mu majwi atugize ahinduka andi, andi agatakara, ugasanga ijambo rivuyemo ritandukanye cyane n'iryari risanzwe hatagaragazwa intego y'iryo jambo. Amategeko y'igenantego rero aziba icyo cyuhu, agasobanura impinduka zidasanzwe mu ijambo.

Ibi bikanagaragaza ko kwandika Ikinyarwanda uhereye ku iyigantego gusa bidashoboka, kuko ibyagerwaho bitavugika mu rusobe rw'amajwi shingiro y'Ikinyarwanda, bigashimangira akamaro k'imyandikire ishingiye ku iyigamvugo.

Amategeko y'igenantego yerekana ko iyigantego ritashingirwaho imyandikire inoze, kuko rikenera amategeko yo ku rwego rw'iyigamvugo afasha kugarura ibintu ku murongo iyo ikurikirana ry'uturamajambo ribyaye amajwi atabaho mu Kinyarwanda.

Bityo iyi nyandiko izafasha abiga Ikinyarwanda kurushaho gusobanukirwa amabwiriza y'imyandikire yacyo, kuko imyandikire y'Ikinyarwanda ishingiye ahanini ku iyigamvugo.

Amategeko y'igenantego nteme ry'Ikinyarwanda yashyizwe mu matsinda atatu y'ingenzi: agenga inyajwi, ayerekeye inyereza n'ayerekeye ingombajwi shingiro.

Buri tsinda na ryo rigiye rigabanyijemo ibindi byiciro hakurikijwe ikiba ku majwi: itakara, ihinduka, iyungana, ishushisha n'ibindi. Kuri buri tegeko hatanzwe ingero z'interuro zirimo amagambo iryo tegeko rigaragaramo. Ayo magambo yashyizwe mu nyuguti zitose kugira ngo byoroherere umuntu guhita amenya ijambo rirebwa n'itegeko mu agize interuro iryo ari ryo.

Ku byerekeye imyandikire y'amategeko, aho bishoboka hose iyi nyandiko yakoresheje uburyo bw'amahinategeko kuko ari bwo bumenyerewe mu myigishirize y'Ikinyarwanda, bunakoreshwa mu bitabo byinshi by'ikibonezamvugo k'Ikinyarwanda mu mashuri abanza, ayisumbuye, amakuru na kaminuza. Ubwo buryo bwifashisha impine n'ibimenyetso mu kugaragaza amategeko. Muri iyi nyandiko ntihibanzwe ku kugaragaza ubutinde n'amasaku kuko ibyiciro byibanzweho ni iby'amashuri abanza n'ayisumbuye, bityo rero bose nta bwisanzure bayigiraho haramutse hagaragajwe ubutinde n'amasaku.

## Ibisobanuro by'ibimenyetso n'impine byakoreshejwe

1. → (akambi): ihinduka, bihinduka, bibyara
2. Ø (ubusa): iburizwamo/izimira ry'ijwi; ibura ry'akaremajambo gasanzwe gateganywa muri uwo mwanya
3. +: ukwiyunga kw'inyajwi cyangwa kw'ingombajwi
4. a→ø/-J: **a** iburizwamo imbere y'inyajwi
5. a+i→e: **a** yiyunze na **i** bibyara **e**
6. i→e/C<sup>o</sup>/e-: **i** ihinduka **e** inyuma y'igicumbi kirimo **o** cyangwa **e**
7. i→e/Z<sup>o</sup>/e-: **i** ihinduka **e** inyuma y'umuzi urimo **o** cyangwa **e**
8. a→y/-J: **a** ihinduka **y** imbere y'inyajwi
9. /-...: imbere ya...
10. /... -: inyuma ya...
11. /: iyo
12. ... - ... : hagati ya
13. umg: umugani
14. imy.:imyandikire
15. GR: ingombajwi y'indagi
16. C: igicumbi
17. Z: umuzi
18. J: inyajwi
19. C<sup>o</sup>/e: igicumbi kirimo **o** cyangwa **e**

## 1. Amategeko y'igenantego yerekeye inyajwi

### 1.1. Iburizwamo/itakara ry'inyajwi.

1.1.1 a → Ø/-J : Inyajwi a iburizwamo imbere y'indi nyajwi.

**Abo** bana ni beza: a-ba-o----->abo

Agacana **akuka** igitoki: a-ka-uk-a ----->akuka

**Abiru** bari abanyamabanga b'ibwami: a-ba- iru----->abiru

Habaye inama y'abahinzi n'**aborozi**: a- ba-oror-yi----->aborozi

1.1.2. i → Ø/-J: Inyajwi i iburizwamo imbere y'indi nyajwi.

**Nareke** kugenda buriye: ni-a- Ø -rek-e

Ingo **barazubaka** zigakomera: ba-ra- zi- ubak-a

**Ntazanshake** sinzaba mpari uwo munsu: nti-a-za-n-shak-e ---> ntazanshake

1.1.3. u → Ø/-J: Inyajwi u iburizwamo imbere y'indi nyajwi.

Abo bana **bapfana** iki?: ba-Ø-pfu-an-a -----> bapfana

**Mvire** ruhande rimwe: n-Ø-vu-ir-e -----> mvire

### 1.2. Kwiyunga kw'inyajwi.

1.2.1 a+i→e: Inyajwi a yiyunga n'inyajwi i bikabyara inyajwi e.

Yavomye amazi **menshi**: ma-inshi -----> menshi

Abana **beza**: ba-iza -----> beza

Agatinze kazaza ni **amenyo** ya ruguru (umg): a-ma-inyo----->amenyo

**Sinateshwa** kwiga n'uburangare: si-n-a-ta-ish-w-a----->sinateshwa

1.2.3. a+u→o: Inyajwi a yiyunga n'inyajwi u bikabyara inyajwi o.

Si byiza **gutoragura** ibyo ubonye byose: ku-Ø-ta-ur-ag-ur-a -----> gu-Ø-ta-ur-ag-ur-a

(k→g/-GR) -----> gutoragura

Nsize **batoye** agatotsi: ba-Ø-ta-ur-ye -----> batoye

### 1.3. Ishushisha ry'inyajwi.

1.3.1. i→e/C<sup>o</sup>; i→e/Z<sup>o</sup> : Inyajwi i ihinduka inyajwi e iyo ikurikiye igicumbi cyangwa umuzi birimo inyajwi o.

**Baramutonesheje**: ba-ra-mu-ton-ish-ir-y-ye -----> baramutonesheje

Ibyo wanditse **ntibisomeka**: nti-bi- Ø-som-ik-a ----> ntibisomeka

Iyi nzoga **nimutayikomera** ntituyinywa: ni-mu-ta-Ø-yi-kom-ir-a ----> nimutayikomera.

**1.3.2. i→e/C<sup>e</sup>; i→e/Z<sup>o</sup>:** Inyajwi **i** ihinduka injajwi **e** iyo ikurikiye igicumbi cyangwa umuzi birimo injajwi **e**.

Akarimi kabi **gasemera** agasaya (umg): ka-∅-sem-ir-a ---- > ka-∅-sem-er-a ---- > gasemera

**Kugenera:** ku-∅-gen-ir-a ----> kugenera

**Imimerere:** i-mi-mer-ir-e ----> imimerere

**Kurekera:** ku-∅-rek-ir-a ----> kurekera

**1.3.3. u→o/C<sup>o</sup>; u→o/Z<sup>o</sup>:** Inyajwi **u** ihinduka injajwi **o** iyo ikurikiye igicumbi cyangwa umuzi birimo injajwi **o**.

Ni we **wandotoreye** izo nzozi: u-a-n-rot-ur-ir-ye ----> wandotoreye

Uyu ni ge **wamurogoye**: u-a-mu-rog-ur-ye ----> wamurogoye

Akazuba karavuye none ntangiye **gukonjoroka**: ku- ∅-konj-ur-uk-a -----> gukonjoroka

## 2. Amategeko y'igenantego yerekeye inyenera.

### 2.1. Ivuka ry'inyenera.

**2.1.1. a→y/-J:** Inyajwi **a** ihinduka inyenera **y** imbere y'inyajwi.

Umutindi **yita** inka indagizo (umug): a- ∅-it-a -----> yita

Ya masaka yose **yasewe**: a-a-se-w-ye -----> yasewe

**Yamubonye** ahita aseka: a-a-mu-bon-ye -----> yamubonye

Amanota **ya** Karigirwa ni meza: a-a: ----->ya

**2.1.2. i→y/-J:** Inyajwi **i** ihinduka inyenera **y** imbere y'inyajwi.

Iyi misozi **yera** ibirayi: i- ∅-er-a ----> yera

Ndashaka **ibyibo** umunani: i-bi-ibo ----> ibyibo

**Kuryagagura** si byiza: ku- ∅-ri-ag-ag-ur-a -----> kuryagagura

**2.1.3. e→y/-J:** Inyajwi **e** ihinduka inyenera **y** imbere y'inyajwi.

Akaje mu buro **barasya** (umg): ba-ra-se-a -----> barasya

Ba uryamyeye **ntiburacya**: nti-bu-ra-ke-a ---->nti-bu-ra-ky-a----> ntiburacya (Imy.)

**2.1.4. u→w/-J:** Inyajwi **u** ihinduka inyenera **w** imbere y'inyajwi.

**Ukwezi** ni ugutaha: u-ku-ezi ---- > ukwezi

Usanze **rwubitse** agira ngo ntirwaseye (umg): ru-∅-ub-ik-ye ---- > rwubitse

Menya **umwuga** bizagukiza: u-mu-uga ----> umwuga

Urugo rw'inkuba **rwisigaraho** (umg): ru-∅-ii-sig-ar-a(ho) -----> rwisigaraho



2.1.5. **o→w/-J**: Inyajwi **o** ihinduka inyererera **w** imbere y'inyajwi.

Uwo munsu **arakwa** aranatebutsa: a-ra-ko-a ---- > a-ra-kw-a ---- > arakwa.

Agasaza **kamwera** akandi **kuzakamwa** (umg): ka-∅-mo-ir-a ---- > ku-za-ka-mo-a ----> ku-za-ka-mw-a ----> kuzakamwa.

## 2.2. Iburizwamo n'iyungana ry'inyererera.

2.2.1. **y→∅/-y**: inyererera **y** iburizwamo iyo ikurikiwe na **y**.

**Ingayi** igaya icyo ibonye (umg): i-n-gay-yi ---- > ingayi

Uyu mwenda **waracuye** : u-a-ra-cuy-ye ----> waracuye.

**Yaratugaye**: a-a-ra-tu-gay-ye: ----> yaratugaye

2.2.2. **y→∅/-w**: inyererera **y** iburizwamo iyo ikurikiwe na **w**.

Nimukora nabi **muragawa**: mu-ra-gay-w-a ---- > muragawa

2.2.3. **y→∅/k-i**: inyererera **y** iburizwamo iyo iri hagati **k** na **i**.

Yampaye **ikibo k'ibishyimbo**: i-ki-ibo ----> i-ky-ibo ----> ikibo ki-a-ibishyimbo ----> ky-a-ibishyimbo----> ky-∅-ibishyimbo ----> kyibishyimbo ----> kibishyimbo ----> k'ibishyimbo

Tubwire **ikivugo** cyawe: i-ki-ii-vug-o ----> i-ky-ivug-o ----> ikivugo

2.2.4. **y→∅/k-e**: inyererera **y** iburizwamo iyo iri hagati **k** na **e**.

Nitugira **ikerekezo** kimwe tuzatera imbere: i-ki-erek-ir-y-o---->i-ky-erek-ir-y-o ---->ikerekezo

**Ikemezo ke** kirakomeye: i-ki-emer-y-o---->i-ky-emer-yo---->ikemezo, ki-e---->ky-e---->ke

2.2.5. **y→∅/g-e**: inyererera **y** iburizwamo iyo iri hagati ya **g** na **e**.

**Ge** ndagiye wowe usigare uganiriza umushyitsi: gi-e---->gy-e---->ge

Reka **nge** kumusura yararwaye: n-∅-gi-e---->n- ∅-gy-e---->nge

2.2.6. **w→∅/k-u**: inyererera **w** iburizwamo hagati ya **k** na **u**.

**Kubaka** ni ukugereka ibuye ku rindi: ku- ∅-ubak-a--->kwu- ∅- ubak-a--->kubaka

Nta kiza nko **kungurana** inama: ku- ∅- ung-ur-an-a--->kwu- ∅- ung-ur-an-a ---->kungurana

2.2.7. **w→∅/k-o**: inyererera **y** iburizwamo gahati ya **k** na **o**.

Kwanga **koga** ni bibi: ku- ∅-og-a--->kwo- ∅-og-a--->koga

Azi **kogeza** umupira: ku-∅-og-ir-y-a--->kw- ∅-og-ir-y-a--->kogeza

**2.2.8. w+y→w:** iyo inyerera **w** yiyunze n'inyerera **y** bibyara inyerera **w**.

**Yakowe** inyana nziza cyane: a-a-ko-w-ye ----> yakowe

**Barafitwe:** ba-ra-fit-w-ye ----> barafitwe

### 2.3. Igurana ry'imyanya y'inyerera.

**w-y→y-w:** Itandukana ry'umusoza

Bino biryo **byatetswe:** bi-a-tek- w-ye ----> by-a- tek-w-y...e ---> by-a-tek-y-w-e (w-y→y-w) ----> byatetswe (k+y→ts)

Bano bana **batutswe:** ba-a-tuk-w-ye----> ba-a- tuk-w-y...e ---> ba-a-tuk-y-w-e (w-y→y-w) ----> batutswe (k+y→ts)

Ya myenda **yaraguzwe?**: a-a-ra-gur-w-ye---->ya-ra-gur-y-w-e ----> yaraguzwe

### 2.4. Iyungana ry'ingombajwi n n'inyerera y itangira ibicumbi by'amazina yo mu nteko ya 9 ari mu bwinshi mu nteko ya 10.

**2.4.1. n+y→nz:** iyo ingombajwi **n** yiyunze n'inyerera **y** bibyara **nz**.

**Inzira** imarwa no kuganira: i-n-yira ----> inzira

**Inzoga** uyikura mu kibindi ikagukura mu bagabo: i-n-yoga ----> inzoga

**Inzara** z'intoki irashira igihemu ntigishira: i-n-yara ----> inzara

**Impugukirwa:** Hari ibicumbi bifata z mu nteko ya 9 n'ibyo mu nteko ya 11 bigira ubwinshi mu nteko 10 bitangirwa n'inyajwi, kimwe n'igicumbi cya ntera -iza.

**inzugi:** i-n-ugi---->i-n-zugi---->inzugi

**inzabya:** i-n-abya ----> i-n-zabya ----> inzabya

inka **nziza:** n-iza ----> n-ziza ----> nziza

**inzara:** i-n-ara ----> i-n-zara ---->inzara

## 3. Amategeko y'igenantego yerekeye ingombajwi.

### 3.1. Iburizwamo ry'inyamazuru.

**3.1.1. n→∅/-m:** ingombajwi **n** iburizwamo imbere y'ingombajwi **m**.

**Imana:** i-n-mana ----> imana

**Imena:** i-n-mena ----> imena

**Maze** kumuramutsa ndataha: n-∅-mar-ye ----> maze

Naza **aramara** irungu: a-ra-n-mar-a ----> aramara

**3.1.2. n→∅/-n:** ingombajwi **n** iburizwamo imbere y'ingombajwi **n**.

**Inuma:** i-n-numa----->inuma

Usye ifu y'**inono:** i-n-nono----->inono

**3.1.3. n→∅/-ny:** ingombajwi **n** iburizwamo imbere ya **ny**.

Yaguze **inyanya** nyinshi: i-n-nyanya ----> inyanya

Si byiza kurira **inyama** gutukura: i-n-nyama ----> inyama

**Inyamaswa** nkenzi ntiyishwe n'umututizi (umg): i-n-nyamaswa ----> inyamaswa

**Inyana** ntiyoberwa nyina mu mwijima (umg): i-n-nyana ----> inyana

Imvura **iranyagiye:** i-ra-n-nyagir-ye ----> iranyagiye

**3.1.4. n→∅/-nny:** ingombajwi **n** iburizwamo imbere ya **nny**.

Bahoze **bannyega:** ba-∅-n-nnyeg-a ----> bannyega

**Barannyuzuye:** ba-a-ra-n-nnyuzur-ye ----> barannyuzuye

## 3.2. Ishushisha ry'inkubyi

**3.2.1. z→j/-sh:** ingombajwi **z** ihinduka ingombajwi **j** imbere ya **sh**.

Ndashaka **kubajisha** akabati: ku-∅-baz-ish-a----> kubajisha

Akunda **kwishonjesha:** ku-∅-ii-sonz-ish-a----> kwisonzesha ( z→j/-sh) ----> kwisonjesha  
( s→sh/-j)----> kwishonjesha.

**3.2.2. s→sh/-j:** ingombajwi **s** ihinduka **sh** iyo ibanjirije **j**.

Sinakwambara umwenda **ushaje:** u-∅-saz-ye -----> usaje (s→sh/-j) ----> ushaje

Shobuja: so-buja ----> shobuja

**3.2.3. s→sh/-sh:** ingombajwi **s** ihinduka **sh** iyo ibanjirije **sh**.

Gushesha: ku- ∅ -se-sh-a ----> gushesha (s→sh/-sh)

Kera **bamesheshaga** amagonde: ba-a-mes-ish-aga ---> ba-mesh-esh-aga ---->  
bamesheshaga

## 3.3. Ishushisha ry'inyamazuru.

**3.3.1. n→m/-f:** ingombajwi **n** ihinduka ingombajwi **m** iyo iri imbere ya **f**.

Mpa **imfunguzo** zange: i-n-fung-ur-y-o----> imfunguzo

**3.3.2. n→m/-p:** ingombajwi **n** ihinduka ingombajwi **m** iyo iri imbere ya **p**.

**Impapuro** zashize: i-n-papuro ----> impapuro

Indwara y'**impyiko** irababaza: i-n-pyiko ----> impyiko

**3.3.3. n→m/-b:** ingombajwi **n** ihinduka ingombajwi **m** iyo iri imbere ya **b**.

**Imboni:** i-n-bon-i ----> imboni

**Imbeba:** i-n-beba ----> imbeba

**3.3.4. n→m/-h:** ingombajwi **n** ihinduka ingombajwi **m** iyo iri imbere ya **h**.

Tugushimiye **impanuro** uduhaye: i-n-han-ur-o ----> i-m-panur-o (Imy.)

**Barampemba:** ba-ra-n-hemb-a ----> barampemba (Imy.)

**Impumuro:** i-n-humur-o ----> impumuro (Imy.)

**Impuha:** i-n-huh-a ----> impuha (Imy.)

**Impugukirwa:** Iyo ingombajwi **m** ikurikiwe n'ingombajwi **h** bihinduka **mp** mu myandikire.

**3.3.5. n→m/-v:** ingombajwi **n** ihinduka ingombajwi **m** iyo iri imbere ya **v**.

**Imvura** irahise: i-n-vura ----> imvura

**Imvune** ye irakomeye: i-n-vun-e ----> imvune

Imvuzo: i-n-vur-y-o ----> imvuzo

**3.3.6. n→ny/-j:** ingombajwi **n** ihinduka ingombajwi **ny** iyo iri imbere y'inyajwi.

**Inyabizi** ibyara ingongerezi (umg): i-n-abir-yi ----> inyabizi

Uyu muni **muranyaka** iki?: mu-ra-n-ak-a ---> muranyaka

**Inyibano:** i-n-ib-an-o ----> inyibano

**Inyinshi:** i-n-inshi ----> inyinshi

**Nyibutsa** izina ryawe: n-∅-ibuk-y-a ----> nyibutsa

**3.3.7. n→ny/-wu:** ingombajwi **n** ihinduka **ny** iyo iri imbere ya **wu** y'indangacyuzuzo yo mu nteko ya 3.

Umuheto wange **nywukundira** ubwiza: n-∅-wu-kund-ir-a ----> nywukundira.

Wunyereke **nywuhinge:** n-∅-wu-hing-e ----> nywuhinge

Umuceri ureze ngo **nywusarure:** n-∅-wu-sarur-e ---> nywusarure.

Uwo mupira wumpereze **nywambare** harakonje: n-∅-wu-ambar-e -----> nywambare.

**3.4. Ishushisha ry'ingombajwi b inyuma y'ingombajwi n.**

**3.4.1. b→m/n-:** ingombajwi **b** idasanzwe ihinduka ingombajwi **m** inyuma ya **n**.

**Imanza** zaciwe ni nyinshi: i-n-banza -----> i-n-manza (n→∅/-m)-----> imanza.

### 3.5. Ihinduka ry'ingombajwi r ikurikiye n.

**r→d/n-**: ingombajwi **r** ihinduka **d** inyuma y'ingombajwi **n**.

**Ndabyemeye** nzaza: n-ra-bi-emer-ye----> ndabyemeye

Yaguze **indabo** nyinshi: i-n-rabo ----> indabo

**Induru**: i-n -ruru----> induru

### 3.6. Izimira ry'inturike hagati y'inyamazuru n'inkubyi.

**3.6.1. t→ø/n-s**: ingombajwi **t** iburizwamo hagati ya **n** na **s**.

**Insina** ngufi ni yo icibwaho urukoma (umg): i-n-tsina----> insina

**Insindirano** ironka ntitsimba (umg): i-n-tsind-ir-an-o ----> insindirano

Uwo **insibo** ihiriye arabumba zikagurwa (umg): i-n-tsibo ----> insibo

**3.6.2. c→sh/n-** : injombajwi **c** ihinduka **sh** inyuma ya **n**.

**Inshike** ntirya **inshikira** (umg): i-n-cik-e----> inshike; i-n-cik-ir-a ----> inshikira

**Inshuti** uyibona mu byago (umg): i-n-cuti ----> inshuti

**Inshabiti** imennye umuhini isubira nyirayo (umg): i-n-ci-a-ø-bi-ti ----> inshabiti.

**3.6.3. p→ø/m-f**: ingombajwi **p**iburizwamo hagati ya **f** na **m**.

**Imfizi** ibyara uko ibyagiye (umg): i-n-pfizi----> i-m-pfizi ----> imfizi

**Imfubyi** y'inkenguzi yirinda icyo indi yakubitiwe (umg): i-n-pfubyi ----> i-m-pfubyi----> imfubyi.

**Imfusha** yaruse ingumba (umg): i-n-pfu-sh-a----> i-m-pfusha----> imfusha

**Imfundiko** zange zarabyimbye: i-n-pfund-ik-o ----> i-m-pfund-ik-o ----> imfundiko

**Imfura** nzima isubiza nka se: i-n-pfura ----> i-m-pfura----> imfura

### 3.7. Itanisha ry'ingombajwi.

**3.7.1. k→g/-GR**: ingombajwi **k** ihinduka ingombajwi **g** imbere

y'ingombajwi y'indagi

**Igikoresho** kigomba gufatwa neza: i-ki-kor-ish-o ----> igikoresho.

**Agati** gacye ntikabura izuba (umg): a-ka-ti ----> agati

**Agasozi** kamanutse inka kazamuka indi (umg): a-ka-sozi ----> agasozi

**Guha** inda ni ukuyirariza (umg): ku-ø-ha-a ----> guha

**Gukeka** ni ko kubeshya (umg): ku-ø-kek-a ----> gukeka

Kuva aho narwariye nta cyo **ngikora**: n-ki-kor-a ----> ngikora

**3.7.2. t→d/-GR**: ingombajwi **t** ihinduka ingombajwi **d** imbere y'ingombajwi

y'indagi.

**Nimudakora** neza ntimuzahembwa: ni-mu-ta-ø-kor-a ----> nimudakora

Utwo dukwavu **uduhoye** iki?: u-ø-tu-hor-ye ----> uduhoye

Ge ndasanga **mufudika**: mu-ø-fut-ik-a ----> mufudika

### 3.8. Ukwiyunga kw'ingombajwi n'inyerera y bibyara ingombajwi ishyizwe mu rusenge rw'akanwa rw'imbere.

#### 3.8.1. **h +y→shy:** ingombajwi **h** yiyunga n'inyerera **y** bikabyara **shy**.

Yantwaje ibyo **nahashye**: n-a-hah-ye ----> nahashye

**Yaboshye** umupira mwiza: a-a-boh-ye -----> yaboshye

**Umuhashyi** ntiyugama izuba (umg): u-mu-hah-yi ----> umuhashyi

Iwacu **baragutashya** : ba-ra-ku-tah-y-a ---- > baragutashya

#### 3.8.2. **n+y→nny:** ingombajwi **n** yiyunga n'inyerera **y** bikabyara **nny**

**Umukinnyi** mwiza ntasiba imyitozo: u-mu-kin-yi ----> umukinnyi

Iyi myenda muyihe **umukannyi** w'umuhanga: u-mu-kan-yi----> umukannyi

**Yaragonnye**: a-a-ra-gon-ye ----> yaragonnye.

### 3.9. Kwiyunga kw'ingombajwi n'inyerera y.

#### 3.9.1. **d+y→z:** ingombajwi **d** yiyunga na **y** bikabyara **z**.

Uyu **mudozi** ni umuhanga: u-mu-dod-yi ----> umudozi

**Ingenzi** ibona byinshi: i-n-gend-yi -----> ingenzi

**Yahonze** ubwatsi bwo kuboha: a-a-hond-ye -----> yahonze

#### 3.9.2. **g+y→z:** ingombajwi **g** yiyunga na **y** bikabyara **z**.

**Byaragaze**: bi-a-ra-gag-ye ----> byaragaze

**Twarahize**: tu-a-ra hig-ye ----> twarahize

**Barawuhinze**: ba-ra-wu-hing-ye ----> barawuhinze

**Guhazwa** : ku-ø-hag-y-w-a ----> guhazwa

#### 3.9.3. **r+y→y:** ingombajwi **r** yiyunga n'inyerera **y** bikabyara **inyerera y**.

Abakunzi **barakuririye**: ba-a-ra-ku-rir-ir-ye ---- > barakuririye

Mvuye gusura **abarwayi**: a-ba-rwar-yi ---- > umurwayi

Ukuri **kuragaragaye**: ku-ra-garagar-ye ----> kuragaragaye

Iyo myaniko **wayikorakoye**: u-a-yi-korakor-ye ----- > wayikorakoye

**Yaraye** mu icumbi: a-a-rar-ye ----> yaraye

#### 3.9.4. **r+y→z:** ingombajwi **r** yiyunga n'inyerera **y** bikabya **z**.

**Mwarakoze**: mu-a-ra-kor-ye ----> mwarakoze

Iyi nyamaswa ni **inkazi**: i-n-kar-yi ----> inkazi

Uyu mubyeyi ni we **wandeze**: u-a-n-rer-ye ----> wandeze

Yatubereye **umuhuza**: u-mu-hur-y-a ----> umuhuza

**3.9.5. r+y→j:** ingombajwi **r** yiyunga n'inyerera **y** bikabya **j**.

**Bwarije** turataha: bu-a-ra-ir-ye----> bwarije

**Ishorejwe:** i-ø-shorer-w-ye---> i-ø-shorer-w-y...e ---> i-ø-shorer-y-w...e ---> ishorejwe.

**3.9.6. s+y→sh:** ingombajwi **s** yiyunga n'inyerera **y** bikabyara **sh**.

**Mwarameshe:** mu-a-ra-mes-ye ----> mwarameshe

**Mwarashashe:** mu-a-ra-sas-ye ----> warashashe (Ishushisha)

**Bamurashe:** ba-a-mu-ras-ye ----> bamurashe

**3.9.7. k+y→ts:** ingombajwi **k** yiyunga n'inyerera **y** bikabyara **ts**.

Uyu **mutetsi** aryoshya ibiryo: ø-mu-tek-yi -----> mutetsi

Za nka **zaratetse:** zi-a-ra-tek-ye ----> zaratetse

**Naramushatse** ndamubura: n-a-ra- mu-shak-ye ---->naramushatse

**3.9.8. k+y→s:** ingombajwi **k** yiyunga n'inyerera **y** bikabyara **s**.

Tukiri abana **twaronse:** tu- a-ra-onk-ye ---->twaronse

**3.9.9. c+y→c:** ingombajwi **c** yiyunga n'inyerera **y** bikabyara **c**.

**Twarabicoce:** tu- a-ra- bi- coc-ye ---->twarabicoce

**3.9.10. t+y→g: ingombajwi t yiyunga ninyerera y bikabyara s**

Uyu mwana ni **umutesi** : u-mu-tet-yi-----> umutesi

Ko ubaza ibibazo byinshi nk'**umutasi**?: u-mu-tat- yi ----> umutasi

Arabwira **abahisi** n'abagenzi: a-ba-hit-yi ----> abahisi

Ibyo bijumba **byarahaswe:** bi-a-ra-hat-w-ye ----> by-a-ra-hat-w-y...e ----> bya-ra-hat-y-w-e ----> byarahaswe

**Impugukirwa:** ku muzi -fat- (gufata) iri tegeko rigira impindurantego iteye itya:

**t+y→sh**

Wa mujura **baramufashe:** ba-a-ra-mu-fat-ye ----> baramufashe

**Igifashi:** i-ki-fat-yi ----> igifashi

**3.9.11. z+y→j: ingombajwi z yiyunga n'inyerera y bikabyara j**

**Umubaji** w'imitima ntiyayiringanije (umg): u-mu- baz-yi ----> umubaji

Ntunsige **ndaje:** n-ra-z-ye ----> ndaje

Iyi modoka **irashaje** : i-ra-saz-ye ----> irashaje (Ishushisha)

Mbonye umwami **uganje** : u-ø-ganz-ye -----> uganje

**3.9.12. c+y→sh:** ingombajwi **c** yiyunga n'inyerera **y** bikabyara **sh**.

Izo ntare **yarazishe?**: a-a-ra-zi-ic-ye ----> yazarishe

**Uwiyishe** ntaririrwa (umg): u-u- ø- iy-ic-ye ----> uwiyishe

**3.9.13.**        **sh+y→sh:** iyo ingombajwi **sh** yiyunze n'inyerera **y** bibyara **sh**.  
**Barihishe:** ba-ra-ii-hish-ye ----> barihishe.  
**Yaramunoshe:** a-a-ra-mu-nosh-ye---->yaramunoshe

**3.9.14.**        **j+y→j:** ingombajwi **j** yiyunga n'inyerera **y** bikabyara **j**.  
**Yarakonje** ntakivuga: a-a-ra-konj-ye ----> yarakonje  
**Yakunje** ipantaro arasimbuka: a-a-kunj-ye ----> yakunje  
**Nakanje** igisheke nshira ibikatsi: n-a-kanj-ye ----> nakanje



## Ibitabo byifashishijwe

- BAKAME Editions. 2010. *Ikibonezamvugo cy'amashuri abanza n'ayisumbuye*. Kigali.
- BIZIMANA, S. 1983. « La quantité vocalique en rwandais ». In : Jouannet, F. (ed.) *Le kinyarwanda : études linguistiques*, p.33-53. Paris : SELAF.
- BIZIMANA, S. 1998. *Imitêerere y'ikinyarwaanda* I. Butare: IRST.
- COUPEZ, A. 1980. *Abrégé de Grammaire Rwanda*, Tome 1,2. Butare : INRS.
- MINEPRISEC 1990. *Ikinyarwanda : Ikibonezamvugo - Iyigantego (Inshoza y'inshinga)*. Kigali.
- IRST. 2005. Inkoranya y'Ikinyarwanda mu Kinyarwanda no mu gifaransa. Tervuren, MRAC.
- JOUANNET, F. 1983. « Phonétique et phonologie: le systeme consonantique du kinyarwanda ». In : Jouannet, F. (ed.) *Le kinyarwanda : études linguistiques*, p.55-73. Paris : SELAF.
- MINEPRISEC. 1988. *Ikibonezamvugo cy'Ikinyarwanda: iyigantego n'iyigamajwi. Izina na ntera*. Kigali.
- MUTAKE, T. 1990. *Iyigamajwi n'iyigamvugo*. Kigali. Régie de l'Imprimerie Scolaire.
- OVERDULVE, C. M. 1988. *Précis de grammaire kinyarwanda*. Kabgayi
- OVERDULVE, C. M., JACOB. I. 1998. *Twige Ikinyarwanda*. Kigali. Palloti Press.